

CHRISTIE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 1 1958

T 3140171483

5

歷城縣志卷第十

哈佛大學漢和
圖書館珍藏印

建置考一

國家之有建置乃辨方正位體國經野之實古司空之職也夫冬官居六典之末而其職曰以富邦國以養萬民以生百物豈非以國氣之盛衰民力之羸蝕物產之息耗具繫於工作力役之事哉縣之建置宋元以前不可悉考自明洪武九年山東承宣布政使司由青州移濟南而後規模燦然畢備

國朝雖畧有因革多仍明舊故今志建置率自明始而創始重修之年月凡可考者悉紀之誠以用民之力為不

可輕也作建置考

城池

舊志作於前明之季屬疆場多故故其志城池也惴惴乎有復隍之慮焉今

國家太平日久百餘年來父老不見兵革衆志成城固於金湯矣又何藉乎增埤築隍以為高深哉然於舊志所載猶必有紀之者古者城郭溝池樹渠之固掌於司馬固不以無事而或疎也

府城

濟南府城舊有城創始莫詳國朝洪武四年始內外

完以磚石周圍十二里四十八丈高三丈二尺池濶五丈深三丈四門東曰齊川西曰灤源南曰舜田今改為歷山北曰會波成化四年分巡濟南道僉事張珩重修十九年巡按御史宋經重修樓櫓皆有記陸通志

歷城建自漢歷晉永嘉間從平陵移治於此而城始大洪武四年始甃以磚石萬歷二十年巡撫宋應昌重修天啟五年巡撫呂純如重修崇正七年巡撫朱大典重修十二年陷雉堞傾殘城堞盡圯樓櫓半焚重闔悉燬今方修築增高三尺舊志

池濶五丈深三尺衆水環縈居然天塹西南高亢則以二閘蓄焉城北又建利田等四閘以時蓄泄獨是地近南山秋潦大發旋濬旋淤且頻年亢旱泉源衰息茫茫巨浸幾埒行潦今方疏濬

東西南有重關而北為水門每歲啟以季春閉於孟冬其門南居中東偏北西偏南北偏東西去南近東去北近故諺相傳為四門不對云東南二甕城各設子門二名放軍門壬申葉憲副大受毅然塞之夫古人建置良有深意卒然有警修復惟艱君子所以貴舊貫之仍也

樓南城前後各一魏莪軒敞屹然大觀東西城如之北城惟一四隅各一而東南城勢偏狹迺委折以因其勢上有九峯俗名三角樓又名九女樓結構天然製自名手南城迤西為觀風樓西迤北東迤南東迤北各一凡一十四座東西南敵樓各一其南諸樓遠眺羣山廣睨萬畝獨踞一方之勝其東諸樓俯瞰三齊遙觀出日顏其額一曰永安一曰鎮海其西諸樓傍挹趵突水直瞭黃岡民廛錯列羣波環縈昔年樓中貯砲自鳴因額曰先聲如雷又後額曰拱宸至於北樓下踞大明湖俯臨會波橋南瞻函歷之雲嵐北醉

鵲華之烟雨外則秧鉞刺水萬畝雲屯內則桂棹沂
波千頃繡列顏曰河山一覽洵勝地也兵殘止餘三
四西南又經砲災目今經營伊始南樓規制勝前次
第修葺光復舊制衛國忘亡拜諸臺之賜匪尠矣
舖與旗相兼內有衛軍直宿夜則千百巡視晨則赴
各該司迴風共計五十有五座

敵臺共一十三座宋中丞應昌創建崇正庚辰又於
西北增置四座

堞口共三千三百五十個崇正丙子成卒數誦遂有
併堞口之役減竈示怯大失古制戊寅砲眼難運後
有鋸堞口之役震刊致碎亦非良策武備志云仍舊
既礙砲眼盡更又難猝辦不如令埴工因勢為模隨
廢漸易誠為便利也

馬道南城二門內外各一皆在東東城二門內外各
一皆在南西城二門內一在南北城內一在東凡五
處崇正己卯創設一處在撫院前

磚陂城以石為趾磚為膚土為骨濶凡五丈近內者
多陂上覆以甃各三尺許所以防水潦之浸灌也戊
寅築望臺修炊竈猝難給辦取資於甃過半事平時
誦未盡興復夫一蟻之微可以潰堤及其摧圮費倍

而城復不堅何惜運甃之勞不為未雨之防也

旗臺共五十五座旗因方色竿皆長桅

官廳門各二座惟北門止一座皆四楹

砲樓門各四座惟北門止二座皆貯銅百子銃一尊

藥局名惠民東西南三門各二座

東西南三門各有弔橋有警則引絙樓上綢繆甚固

西門橋外復有灤源橋

排柵東西南三門外皆列排柵非獨美觀亦以防行人冗塞恐致覆溺也

列陣以下皆有護隍東方高聳北方寬衍廣至數丈

近遠環水建演武場東西各一西城至南城舊皆闕
弁牟利市為民居無慮數百家相沿數十載戊寅有
警逼而去之民大缺望庸人見小不為遠謀今毀故
垣徧築女牆後之君子慎無信小人漁利之謀因緣
復築令滋蔓之難圖也

瓮城原以貯軍勢宜寬廣西城建廟踞三之一餘復
列為市廛危警猝至拆之又以敏怨何愛數廛之息
不為徙薪之計至南為正門建廟植楊雖愚卒崇神
之意實全城風氣所關遷其廟而伐其樹無再計矣

以上俱
舊志

府城康熙十四年巡撫趙祥星重修二十七年巡撫
錢珏重修府志

曾鞏齊州北水門記濟南多甘泉名聞者以十數其
醜而為渠布道路民廬官舍無所不至滴滴分流如
深山長谷之間其匯而為渠環城之西北故北城之
下疏為門以洩之若歲水溢城之外流潦暴集則嘗
取荆葦為蔽納土於門以防水之入既弗堅完又勞
且費至是始以庫錢買石僦民為工因其故門累石
為兩崖其深八十尺廣三十尺中置石礎析為二門
高皆用木視水之高下而閉縱之於是外內之水禁

齊宣通皆得其節又無後虞勞費以息其用工始於
二月庚午而成於三月丙戌董役者供備庫副使駐
泊都監張如綸右侍禁兵馬監押仲懷德二人者欲
後之人知作之自吾三人者始也來請書石故為之
書是時熙寧五年壬子也太常博士充集賢校理知

齊州軍事曾鞏記

南豐類稿

艾俊重修舜田門城樓記濟南舜耕地也泰岱踞其
前濟水抱其右風淳俗美尚學務農故歷代文人顯
宦以道德政事稱者多出其間春秋而降為郡為州
沿革不一惟皇明混一之初革元之治置布按二司

而附以府運衛縣邇來分封於此遂改都司為藩府
舊有土城年代無考洪武四年始設磚石甃砌周圍
一十二里四十八丈高三丈二尺闢四門東曰齊川
西曰灤源南曰舜田北曰會波俱有子門城角及門
建有一十三樓或新或修歲分久近獨舜田之樓柱
腐瓦解日就頽圯非一日矣成化戊子錢塘張公珩
以侍御出僉東臬總六郡軍政公有為有守郡人皆
仰如神明政暇顧瞻樓敞而嘆曰此吾分內事也不
新之曷克稱保障黎元之地哉乃謀於同寅修之未
幾樓成真一郡之壯觀也是役也都憲主之張公倡

之諸公開誠勸諭有司隨求備輸故勞雖大而從寬
費雖巨而易完矣張公以保障吾民之盛心為興廢
舉墜之務其德宏其慮遠斯不可忘廼命工礱石為
記竊惟春秋凡用民力必書以譏之今作南門樓惠
浮於人故民樂獻其力智周於物故工喜薦其技矧
復積之有素使之以時是宜易舉而亟成也彼何辭
以致其揄揚之美第觀是役無春秋之譏益重金湯
之勢地利人和兩得之矣國之保障永永是賴後來
為政者又所當知也故書以記之

陸通志

尹龍記畧濟南府山東首郡今親藩在焉三司治所

在焉鎮守巡按治所在焉地介青兗二州之衝東有琅琊西有清河南有泰山北有渤海舟車遠近往來相續其城舊有四門門皆有樓南曰舜田北曰會波榱楠尚完西曰灤源東曰齊川則創自前代及今踰百年矣朽敗弗稱成化壬寅監察御史宋公經按茲土下車之初顧瞻嘆息急欲改為會時未可明年癸卯巡歷既徧值歲大和公私俱足乃謀於鎮守及藩臬長遂鳩工撤舊而維新之時亞叅王公道僉憲侯公恂分司濟南實專程督都閻庶公政極力贊襄肇工於四月十五日再閱月而告成重簷複道跂如翼

如射孔星連曲欄森衛睥睨業起閉牖高懸言言侷侷月城樓視內差小而制度如一巍然真然信足以聳觀瞻而消姦慝自經始至落成爲日九十爲夫十百材以株計者千錢以緡計者萬皆出自公帑足以贖刑之金民但見其速成而哀聚之不加役使之不及於是咸喜頌焉

同上

官署

有官則有署署者布政出治之地也縣之官署自明初始爲省治而備故舊志所載亦明以來爲詳

國朝設官分職或因或革明之官署至今又多非其故矣

茲以見在者列於前而以故署附於後至齊乘所載宋之舊府治即今布政使司署也則詳古蹟考中而不復見於此

縣署

歷城縣署南至濟南府北至巡鹽察院東至塔行街西至東華門大堂六楹顏曰愛牧堂東庫房四楹左右吏舍各十六楹堂前戒石亭亭前儀門四楹儀門兩腋為角門東角門外為土地祠西角門外為寅賓館館有額曰大賓館門西有獄獄中有廣生室獄神祠草舍十楹獄南為倉儀門外為大門四楹門內有

收糧房門外有屏旁有舖堂後有退堂有衙舍有內書房堂西為西書房又西為清軍衙又西為水利衙今裁又西為管糧衙又西為巡捕衙凡五衙崇正己卯燬於兵知縣宋祖法捐俸重建舊志按寅賓館久廢管糧衙亦裁倉移於縣治之西北清軍水利衙今改為馬驛

知縣署在府治北 大門外有申明亭旌善亭 縣

丞署舊在縣堂東 典史署在大門內西北 灤關

批驗所署在灤口 譚城驛舊在城東門內今并在

縣 龍山驛署舊在龍山鎮今并在縣 陰陽學署

醫學署大約家居領職署雖設空廢 僧會司道會

司各隨其所居寺觀常署 岳通志

按申明旌善二亭久廢縣丞署亦無定所

縣倉在縣西巷舊倉四十二間康熙年建新倉十七

間雍正八年建

社倉設於四鄉雍正元年後報建

養濟院在城內又普濟堂在城外趵突泉西又育嬰

堂在城內北 以上俱岳通志

按縣署不修已久乾隆二十八年楊成龍重修二

堂三十年藍應桂重修土地祠大堂三十一年德

琳復修內外房舍又於二堂東建齋曰聽泉

高大經題名碑記嘉靖辛卯高子自蒲臺改令歷下

越明年壬辰會修東省通志為考昔之官歷者匪惟

其政與名絕莫存紀念為惜之高子乃博構諸廢牘

斷案士彥鄉髦得何令而下二十有四人遂謀於僚

眾勒諸石以永勸戒仍虛其次以俟來者既就業僚

眾曰彰往於幽孰來於顯斯役也其不畔於義乎吾

子盍申言之乃作而言曰君子修其職以自成也其

自成惟民生其不自成惟民病且死厥惟重哉是故

令有四善而守已不與焉視民如子者善愛處事如

家者善理用財如已出者善節事長上以正者善忠
 斯四者民之所繇生也令有四惡而衰悞不與焉黷
 貨者食民肉惡貪依刑者殘民膚惡酷喜上者奪民
 業惡虐惠姦罰民者喪民心惡昏又有四似而矯激
 不與焉縱弛者似寬厚苛察者似嚴明急末務以悅
 長上者似勤勞違道以干百姓之譽者似惠利斯八
 者民之所繇病且死也嗚乎四善予罔不畔違日力
 以求之而未能也四惡四似予罔不出入日力以去
 之而亦未能也敢不懼哉乃若先我諸令其善其惡
 其似予莫能稽惟民所思繼我諸令或似予莫能量

惟善是望僚衆曰嗟乎諒哉修職以自成取舍於此

足也請書之以告

舊志

王象晉重建縣治大堂記汝南宋公治歷之明年則
 今皇帝之十有三年也政化及行民用安息秋八月
 其聽治之堂始落成焉先是已卯之變濟南列署悉
 經兵燹而縣治為甚自廳事以暨吏舍正門以及賓
 館內而錢穀所儲下至罪人所棲鞠為焦土令君朝
 莫坐堂皇聽庶事則設茨以居胥入白事出輒肉籍
 袖中長者至門閭吏不敢延請荷校之夫相與枕籍
 風露非不銳意更新無如時詘何矣夏六月公來治

歷招移綏忙息紛戢暴披瓦礫掩齒骸履阡陌闢草
萊昕夕執掌歸則坐堂皇聽庶事依然爰中而已左
右間以為請公曰遺骸在地流移在道婦子采葛蔽
樗在野未遑也弗許逮民小既小憫矣左右又以請
公曰城郭未葺臺署未建先正名祠未復未遑也弗
許逮百廢漸興矣左右終以請公曰飛蝗蔽天野無
青草民多疫癘道殣相枕未遑也又弗許已而公見
胥入白事出輒內籍袖中也秋九月乃作吏舍數十
楹如昔制見長者至門閤吏不敢延請也冬十月乃
作大門四楹虛受堂四楹如昔制又見荷校之夫相

與枕藉風露也十一月乃作廣生室數十楹悉如昔
制浸尋至今年之夏亢陽疾風聽治之爰日捲數重
茅宵見星月且值禱雨屢應民望有秋公曰可矣乃
出先後俸錢庀材鳩工再閱月而告成匠石至於徒
役凡若干人棟甍至於傭糈凡若干緡經始至於落
成凡若干日於是左右奔走於茲堂胥慶曰公堂成
矣而不知費之何以出羣黎環睹於茲堂胥慶曰公
堂成矣而不知力之何以勞薦紳學士胥謁於茲堂
胥慶曰公堂成矣而不知時之何以詘功之何以集
中秋上日值公初度予自桓臺走歷下躋堂稱觥公

歷城縣志 卷第十
因以記屬予予退而嘆曰若公可謂家視其官矣章
綬君子往往視公舍如蘧廬雖極圯敝亦冀倖超遷
以勸貽後人即稍加塗茨稱故事已爾而公之草昧
經營咄嗟立辦也如此否則窮極壯麗動擾民間輪
奩雖美怨愁偕集而公之竹頭木屑咸資俸餘也如
此又或因陋苟簡狹小制度取具目前弗克經久而
公之規畫久遠矩摹宏敞也又如此匪直此也築城
濬池建列署修廢祠其蠱飭而鼎新者不獨此堂為
歷下急呼以請民命募人捕蝗以恤民災嚴汰冗役
以清胥弊設鐘於獄以察寃囚其興利而起敝也不

獨此堂而堂其大者也若公可謂家視其官矣公名
祖法字允繩別號澍水河南汝寧之蔡人甲戌進士
初令齊河已卯夏自祁門遷歷下歷之明年秋八月
始成此堂而新城王象晉為之記因作頌曰瞻彼岱
陰巖城斯臨維齊歷下嘉名至今懿厥治所面巖背
渚歧翼翬飛爰居爰處匪茹突來回祿肆災次鱗錯
繡蕩為煨埃棟橈已脫集壁四達不見宓堂乃見召
爰公來齊州民用見休百廢俱興公堂廼修卜云其
吉作堂秩秩經之營之成以不日殖殖其庭有覺其
楹君子蒞止既和且平華峯奕奕灤水恒碧於萬斯

年令德無射

同上

盛百二聽泉齋記歷下之泉甲海內著名者七十二名而不著者五十九其他無名者奚啻百數凡官廨市廛之間澼澼流階除者隨在皆是不擇地掘之數尺無不及泉蓋濟南在岱宗之陰歷函鵲華匡粟諸山皆泰山之支脉地秉陰竅於山川不崇朝而徧雨乎天下者泰山之雲也不擇地而四出無方者泰山之泉也說者謂濟水伏流發源於王屋未免舍近族而遠宗矣臨桂胡書巢始筮仕蜀什邡令蜀固饒山水吾鄉張瓜田庚曾為作聽泉圖取竹垞太史送什

邡令訟向泉邊聽之句也既而書巢以憂去服闋改官山左乾隆丙戌夏四月由濟陽調歷城秋七月淫雨連日夜不休諸水暴溢敗官民廬舍甚夥書巢請於憲司出公帑萬緡簡核民居之宜修築者量其貧之等差而與之值又舉官舍頽垣易土以磚甃不為傳舍苟安之計復於廳事之東構屋數楹為退食視事之所瓜田之園有適合者遂名之曰聽泉齋予向於瓜田所聞書巢名庚辰游濟南始遇於廉使沈公署相得如生平今忽忽七年矣適奉檄勘歷下田廬之被水汨者又將發倉廩以賑貧窮與書巢共事一

方於其落成之日偕賓僚共飲於斯咸以是舉適輕重緩急之宜儉而中禮遂援筆而為之記集 柚堂

萬壽宮縣治南鹽運司舊址朔望羣僚朝賀之所康熙四十三年分守濟東道僉事宋廣業修續志

宋廣業記畧濟東道署之西原鹽運司舊署以運使移居驛傳道而濟東道兼理驛傳事乃以鹽署歸濟東署中前二層為朝賀之地歷有年所康熙甲申六月廣業分守濟東遂損貲修葺堅築牆垣增易棟梁建東西朝房

萬壽醮壇及大門二門前後四層共房二十九楹又修照壁一東西轅門二閱三年而成乙酉春

六龍東幸士民請建

萬壽亭得
俞旨士民仰被

皇恩截漕捐賑蠲租煮粥連歲饑荒藉以安集故人人感奮鼓舞踴躍即於朝堂後啟建

萬壽亭亭內刊刻

皇上各恩諭石碑又立牌坊二以肅觀瞻大中丞趙公暨藩司高公臬司葉公濟南韓郡守實贊成之謹紀以詩

聖主求民瘼洪鈞轉世屯恩波正浩蕩愛戴出忠純齊魯荒連

歲飢寒痛切身截漕廣賑粟蠲賦絕征緡載發公家
帑還馳近御臣多方籌軫恤屢

詔沛深仁冀彼蒼穹格哀茲赤地貧頻年垂雨露比屋取禾困
雖曰天心佑端由

帝德臻懽愉騰兆姓踴躍徧羣倫

萬壽萬呼應三多華祝陳豐碑鐫至治傑構煥殊綸突兀雲霄

迥輝煌藻采新官寮歌喜起士庶樂清淳世世當無

極年年慶大椿同上

巡撫部院署

巡撫都察院舊在濟南府城西南隅今遷城中德藩

舊址康熙五年巡撫周有德建趙通志

撫標左營叅將署在院署東岳通志

按自乾隆十二年移於尹家巷

左營守備署在歷山頂據冊

撫標右營遊擊署在院署西岳通志

按自乾隆十二年移於南城下

右營守備署在衛巷據冊

濟南城守營叅將署在東縣巷同上

城守營守備署在城隍廟街同上

承宣布政使司署

山東等處承宣布政使司在濟南府治西北洪武九年自青州移於此天順四年重建前為大堂後左堂右堂並設康熙七年裁右堂經歷司在正堂左照磨所在正堂右理問所在儀門外西廣儲庫在理問所南舊志載有司獄司久裁 督糧道在布政司大門內東舊稱稅糧道 濟東道在布政司大門內督糧道東康熙十二年建舊志載濟南道在司外之東分守登萊海防道舊志載海右道在司內東兗道東今在萊州府 舊設分守東兗道在糧道東裁越通志布政司署併有叅政叅議等署今皆改建於外岳通志

按今惟經歷司署在大門內東廣儲庫大使署在儀門內西餘官或裁或移俱非其舊矣

彭時記國家稽古州牧方伯之制設官以統治於外爰分天下為承宣布政司者十有三山東其一也山東密邇京畿包古齊魯二大國邾莒滕薛諸小邦廣數千里地莫重焉而布政司開治濟南據地之中其官之長有使使之亞有叅政叅議皆重職也以重職臨重地其居處器服固宜備稱而况聽事之堂乎是堂也涖衆同遠宜莫與校大而因循其舊歲久且頽改為有不可緩焉者越天順四年之春左布政使劉

公攷右布政使李公顥以時和歲豐民安無事欲撤而新之謀諸叅政柳公春李公讚黃公宗叅議梅公森賈公恪僉為宜即疏於朝報可乃命濟南知府陳銓亢鉅材鳩良工言出事成役夫雲集於是諏吉始事以次改為制度高廣悉加於舊中為正堂高四十二尺廣加高二十尺深殺廣十尺前甃月臺環以石闌其前表以三門其左右翼以兩廡退休有室居吏有舍總之為間三百四十為楹六百八十舉目四顧煥然一新而規模宏壯繪飾偉麗足以表崇重而聳觀瞻稱古方伯臨數千里之勢者矣經始於是年五月

而以八月落成焉方其未成也劉公奉召命入朝為副都御史巡撫南畿而李公陟左繼為右者曾公翬也李曾二公克以厥心以究其成因相與圖識歲月於石以示久遠乃走書京師屬筆於予而劉公適自南至助為之請予不獲辭為之言曰山東之有布政司實以統治一方而布政司之有堂則政治之有所自出也故凡朝廷深仁厚澤之下於民者於此乎敷宣民之貢賦上供者於此乎經畫政令條教於此乎弛張歲時慶祝於此乎致禮賢能於此乎賓興生民於此乎具瞻列郡於此乎取則境內大小之職於此

乎聽令而考成非徒崇飾以為觀美而已故凡居是者誠能端乃心公乃行期盡乎所職以成一方之治庶幾稱斯堂而無愧也其或各私其私曠厥職而不之盡使一方之民缺望焉則俯仰斯堂豈不歎於中哉今諸公皆以才德顯著遷蒞於此其新斯堂也財不費官役不罷民有興仆易壞之功有增庫為高廓淺隘為深廣之智有經遠邦國之仁因事以推其心則其能同寅協恭一堂之上秉公黜私盡厥職以副我國家設官統治之意蓋可知矣然諸公代遷有期而斯堂之傳無窮不有以示後則後之人孰知大斯

堂者實自諸公始庸記以告俾來者顧斯堂思勉履職增光於前政不怠將山東之民永有賴焉陸通志
 提刑按察司署

按察司署在濟南府治東近東城垣明洪武中建亦自青移治於此成化中重修 經歷司在正堂之左照磨所在正堂之右司獄司在儀門外之東 提學道在按察司內東外衙門舊在羅姑泉巷東今在明湖之南北向 舊設濟南道海右道在按察司東清軍道驛傳道在按察司南趙通志 彰善亭癉惡亭按察司街東西相對嘉靖五年建內

有聖諭碑知縣郭永泰重修已卯燬舊志

提刑按察司署在城內東明洪武九年建初在城西

南成化九年因燬於火乃即濟南府署為之按舊

志并宦績志俱載濟南府署為知府陳修所建乃即

舊開元寺為之因舊署為按察司署也及考歷城志

載危素濟南府治記成於洪武三年內云時舊治已

為按察司夫按察司之移自洪武九年則危記誤也

然成自知府陳修則又非成化九年矣二証并存之

岳通志

按今惟存經歷司獄二署餘官或裁或移皆非其

舊

商輅記山東按察司公宇創自洪武初逮今百年歲

月既久頽圯滋甚按察使豐城李君方下車即議修

葺而計費甚鉅慮擾於民因循數載邇者朝廷清明

境內晏然獄訟弗興聽斷多暇乃謀諸同寅謂事有

不得已而為之者如公宇頽圯非但無以起人瞻視

且懼有摧壓之患矧吾輩受祿過厚與其私於衣食

孰若節縮以力資材之費以為經久之利乎眾皆曰

然遂各捐俸為助而役使在官卒徒顧募外郡工匠

伐木陶甃卜日就事自廳事以及庖厨之類修葺之

未有者增建之如正堂前後各五間皆易朽以堅易腐以壯輪奐之美有如新造舊經歷司照磨所去堂甚遠今遷堂之左右舊東西吏舍以間計三十六今增為六十六舊有神祠依堂隈今擇明爽地建於經歷司之東公堂之前新建儀門之前改建大門三後堂左右建齋宿房庫房廚房通二十間舊堂之前東西廣四十步今倍之舊三門直南惟衢路一今東西開廣四十步舊前門西街有肅政坊一東街缺今撤舊增建東扁曰振紀西仍舊榜房列於大門內今建於大門外東西各二十一間肇工於己丑七月至

十月畢工堂構崇嚴規模軒豁出入之際人心肅然李君既率眾落成復走書徵予記惟按察司實風紀所係堂堂憲府式表一方顧可安於簡陋而諉諸後來乎是宜葺之使新擴之使宏而超軼前規也與雖然孔子以仁為安宅孟子以仁為廣居聖賢之意蓋有出於上棟下宇之外者今茲公宇既新諸君子朝斯夕斯寧無暢然於中者乎必也端其心如公宇之正擴其量如公宇之廣操存如公宇之潔照燭如公宇之明使姦者至而膽落強者進而股慄夫然後公宇若益而高風紀若增而重於治道非小補也已諸

君子其勉之哉李君名裕由名進士良御史陟今官
廉公有為而副使鄭君敬劉君敬董君廷圭僉事周
君濠茂君彪陳君善俞君璟常君振張君珩皆節操
方正將來功業皆未可量記成李君既遷秩適憲使
王君林繼至遂偕新任憲副陳君相僉憲楊君琅劉
君時敦董君琳王君綸重構東西廨舍凡八十餘間
以足其未備云

陸通志

薛瑄山東按察司題名記古者職風紀司諫諍各有
其官我皇明有天下準酌古今定立官制乃罷諫官
而以言責付之風紀凡任御史按察者於百司之邪

正庶獄之冤疑既得扶抑而伸理之至於國家大小
之政生民休戚之情又得條陳其得失而疏通其壅
蔽是其關係治道之大類非他比故自祖宗以來著
令選任風紀必於端人正士通儒術識大體者取之
而雜進之才弗得以廁其間列聖重光咸用茲道今
皇上祇若成憲爰自臨御之初即簡飭內外憲臣使
各修其職繼命儒臣考定憲綱成書頒布風紀諸司
俾遵行之由是紀綱以之大振庶政為之咸新正統
元年夏予自內臺來僉山東憲事又三年為正統四
年金谿王公裕亦由御史陞秩憲副嘗與予論風紀

之重如前所云者將刻今按察諸公之名於石仍虛
 其次以俟後來之為是職者并刻焉且屬予記其事
 嘗觀司馬公之記諫院題名也謂後世將指其名而
 議其忠詐曲直有可懼者今之選任按察既為國家
 所重所謂扶正抑邪洗冤澤物論天下之事廣視聽
 之公關係治道之大又非特諫諍之一事而其列名
 茲石也後之人亦將歷指而議之曰某也賢而舉其
 職某也否而廢其官是其可懼殆有甚於司馬公之
 所言者矣然則凡我風紀君子其可不自重也夫其
 可不自慎也夫

同上

分守濟東道署

分守濟東道署在府治東舊本在布政司署東康熙
 三十七年移建原巡按察院署後為總督署又改為
 提督署今為濟東道署

岳通志

都轉鹽運使司署

都轉鹽運使司在府治東洪武元年建經歷司在司
 內洛口批驗所在城西北十八里

陸通志

都轉鹽運使司舊在按察司西順治十八年即巡道

舊署改建 經歷司益昌庫在司內 濱灤分司舊

志云在青州順治十八年於按察司西南舊驛傳道

署改建 膠萊分司舊志不詳處所康熙五年於貢

院路北即守道舊署建趙通志

按濱灤分司自乾隆十九年移駐蒲臺膠萊分司

亦於十九年移駐膠州

府署

濟南府居城之中近南舊治改為按察司洪武初崔

太守亮建崇正己卯燬太守張公 重修清軍同知

廳在堂東北 糧儲通判廳在堂西北 馬政通判

廳在堂西崇正己卯裁 理刑推官廳在堂西

有坊曰平衡齊魯己卯燬司理印祖德重定

司在堂左 照磨所在刑廳東 司獄司在二門外

東 稅課司府治西崇正初裁 廣儲倉廣豐倉俱

府治東南上有樓額曰東齊司命 陰陽學在布政

司西 醫學在府治東 織染局府治西北久裁舊志

按崔亮所建者即舊府治之改為按察司者也今

府治則成於陳修詳見危素記舊志誤

府署內舊有馬政理刑二廳今裁康熙二十五年知

府蔣焜重修內署府志

知府署在城南大街東舊為開元寺明成化九年移

建其制為大門為儀門為戒石亭為蒞事堂翼以六

曹吏胥房堂後為庫為二堂為內宅大門之內左右
為寅賓館為土地祠為獄大門之外左右坊表前施
行馬 清軍同知署舊在府堂東 糧捕通判駐德
州舊在府堂西康熙十六年移駐德州 城守營叅
將署在縣東巷隨營備弁或存城或守汛無常署
經歷司署舊在府大門內西 司獄司署在大門內
東 廣豐倉大使署在本倉內 府倉在城東南隅
即廣豐倉共倉八十間康熙年建 陰陽學署醫學
署大約皆家居領職僧綱司道紀司附居寺觀向無

常署

岳通志

危素記天子即位之二年勅海內郡縣皆建公署以
駭衆觀仍命中書以圖式示四方事竣俾刻石以紀
歲月并載什用之物於是濟南府治所成郡中耆儒
安禮楊諒等以言曰吳元年天兵下濟南居民安堵
如故明年建元洪武正月侍儀使崔公亮實知府事
三月率僚佐視事於舊治撫綏得宜吏民咸服時總
兵官信國徐公空青萊二府粟帛至郡庾藏未備廼
建三倉曰廣盈曰廣運曰廣積總為三百餘間整齊
有法因修城堞其東南之偏皆山石不可溝洫遂大
鳩工力不日而就方綜理有緒而是歲九月以奔母

喪而去又明年正月以尚書兵部郎中廣信陳公修來守郡上出內帑金幣以賜二月至官議遵令式置公署時舊治已為按察司欲采木石更作必大勞民力莫若因今驛舍之在浮屠開元寺者從而葺之則事易集而民不擾士民皆歡欣鼓舞經始於三月壬寅正六月正廳成扁曰敬事堂後曰琴鶴堂兩廡大門俱成推官聽經歷司架閣庫列於兩旁知府同知通判區宅築於後幕官府吏廬舍依於兩翼為屋千餘楹屋瓦鱗集器用畢具驛舍則徙於東為屋又百餘楹祠城隍神歷山之上築風雲雷雨神壇於城南

社稷壇於城西各又五十楹仍修築西城千五百丈以繼崔公未畢之役距城二十餘里大小清河之衝堰頭鎮置通遠倉以通漕運素惟濟南之為郡岱宗當其前鵠華經其後泉流奔湧灌溉阡陌民庶繁夥舟車輻輳實乃要會之地故置行中書省以尊藩服且山東自兵燹之後獨濟南賴天戈所揮休養生息年穀稍稔流離漸歸而兩公當造邦之初事役輻輳法制始行剖繁劇而刑不施均工役而民無怨可不謂知為治之本與况是邦孔子廟既修生徒就列庖膳有次而民社興舉學業者日多時崔公方起復為

禮部尚書聞之亦必為之助喜也顧不遠千里屬筆於素故數書之相其役者通判姑蘇陸景祥推官錫山于英經歷廬山陳汝言知事雪川莘景伊凡本府督工胥吏及什用之數咸列於碑陰洪武三年正月

記陸通志

李開先重修濟南府治記濟南為東省首郡不但土物沃饒而城隍館舍五郡亦不先焉惟是府治規制淺露棟宇歲久破落地形前隆後庫水無所於洩人無所於棲每逢積雨少有全垣屢經葺理勞費不貲長吏固知其非計然以土木工料破冒繁難又憚於

開白經畫甫三歲陞擢去矣補偏救敝因陋就簡天下之為政者大勢如此固不止一府亦不止興造一事云爾唐谷喬公起家進士嘉靖庚子遞遷郡守履任之後見堂廡日就傾圮難為出政之區慨欲改作以歲災相屬又惠未及民不為說使乃以清白自將精勤遇事處上恭而有節御下嚴而不苛賢僚有託以腹心疑獄如見其肝膈重刑莫用吏鮮驚行枹鼓稀鳴市無狗盜多方督賦以粟易蝗練兵無虛禮士以實麗省之郡仰承撫按諸司之所賫辦雖五馬二千石其尊貴加於縣屬不多也候謁揖拜率以破暝

而往薄暮而還燃炬而後視事公居之畧無難色而綽有能聲非其強幹之質得於生成而剗剗之才由於學問吾見其不草就則瀾倒矣越三年壬寅政成民和乃謀之同官請之監司鳩工量材取石於歷山之麓伐木於太湖之濱以平直而市顏采以賑飢而役丁夫為大堂者五間後堂稱是樓亦稱是大門二門以間計之各三經歷照磨廳亦各三碑二座周圍樹以堅墉低窪鋪以美壤由是望之森聳即之安平輪奐鮮明而門牆軒敞信乎為出政之一大郡所也為費不過六百金計時未踰九十日用力少而成功

多非其調度周詳何以致是其僚友鄭李二別駕孫吳二通府一劉節推皆贊襄有功者讌會落成之後走書章城索予記其事因記而復告之曰不一勞者不久佚不暫費者不永寧然孔子作春秋築一臺新一門無不備書者何也謹其廢時奪民也唐谷此舉脫非善於乘時用力雖久佚永寧弗貴也况於作無益及為不急之務者乎唐谷嘗推西安矣予出使日親見其行事而韓野田侍郎康對山修撰同稱之嘗同知淞江矣而陸儼山宮詹稱之猶夫韓康也嘗徵取至京矣以王府為眷屬不得備宿衛仍補外僚此

出於王太僕一時激奏後遂沿襲而不改立賢無方
此人心同望於聖明之朝者也楊邃翁曾疏之矣唐
谷由此內拜行道濟時必有大可觀者其守濟南也
予為選部郎力薦之今其政績視袁宏之在東都侯
霸鄭洪之在臨淮何以加焉唐谷有古良吏風而予
獲知人之名矣能政而又能新府治諸公之所知者
其前事或有諸公之所不及知者乎因并記之於以
傳來而繼往唐谷山西霍州人名瑞字觀之陞任河
南副使鄭名紋李名柰孫吳名欽名九經而劉則今
兵部名燾者是已

開居集

蔣焜修內堂記畧子夏稱山書云地東南為緯西北
為經高者為生下者為死按此則宜高而高宜下而
下高下失位罔利厥居不可不審也余以乙丑歲來
濟南顧瞻堂皇規模靡異及入內署則每進益下且
歷年久椽傾棟損若將圯然予庸是懼規改造焉凡
陷者實之卑者培之壅者平之較前之土隆五尺焉
第一為琴鶴堂稍高後為居室又稍高前後左右俱
翼以廂房又樓一舊貫也重庀之費猶造矣琴鶴堂
東為丙舍者二前曰宜冰軒後一所顏之曰愛日又
進為書屋琴鶴堂西又丙舍一前後統計不下百餘

間是役也起於丙寅仲春落成於秋應櫺門戶以堅
 緻則勝前堂廡齋舍以高爽則隆吉丹黝堊墁也以
 光華則中度昔齊景公欲為晏子更宅晏子固辭顧
 如上所慮不得不為此役也幸以公署非私居屋廬
 非亭榭縱擲三千緡於無取償之地得為後人計安
 久亦君子之所樂為故畧鐫於石

舊志

提督學政署

學政署係學道本署即本府校士館舊在縣東塔行
 街明嘉靖二十一年移建大明湖之南北向原至道

書院也

岳通志

虛明閣提學道內

舊志

吳同春山東提學道題名碑記道舊有題名碑蓋昉
 於長洲袁公至萬歷八年湘潭周公欲補所未備仆
 而礮之未及鐫尋擢去今十年所仆於地予竊慨焉
 已得原碑斷簡又諭諸故老得薛文清公而下若干
 人鐫之自是上下二百年泣茲職者大都備矣予因
 是竊嘆古今為學之難易而人材亦係之云夫三代
 盛時學校之設要在明倫故六德六行其目也四教
 四術其輔也修諸已而措諸家國天下其實用也當
 是時上無異教下無異學安此者謂之聖勉此者謂

之賢而悖此者謂之愚不肖道術章顯心志純一烏
知所謂詞章焉者士生斯世何學之易也故其成材
也亦易叔季道術分教亦非古孔子對君首揭達道
之訓而子夏以盡倫為已學孟子謂孝弟盡堯舜斯
三代立教之遺意與漢以後難言矣我朝郡邑衛所
莫不有學又一切罷詞賦崇經義特設憲臣以董督
之夫董督何必憲臣哉祖宗謨謀深遠矣蓋學官其
專責守令其提調而堂以明倫其指歸也學官弗勤
提調失職俾士廢學而倫弗明憲臣行部考核而糾
舉之不獨責之士耳乃今舍五教弗講惟蒿目苦心

以校文藝品隲稍當輒謂盡職倘以明倫責學官未
有不羣然駭者况問令若守其提調何狀乎是古以
明倫今以課藝考核糾舉之憲臣與守令學官之職
事無以異也士見上之意指若此日夕工藻績蘄合
主司之繩尺白首且不休安事明倫士生斯世其學
豈不甚難矣哉故其成材也亦難東省故鄒魯地天
下之望也士服習孔孟遺訓浸灌道德成材最易藉
令學官勵精守令效職教以明倫有不然者憲臣奉
祖宗功令以考核而糾舉之不厯厯以文課以此風
厲天下何患今世人材不與三代盛時比隆較烈哉

余不敏即課文未能而妄意隆古愧矣顧三代立教之旨固如此遂因鐫石而述其概云袁公諱洪愈周公諱之屏各履歷載下方萬歷歲在庚寅上元日碑據陳沂震學使題名碑記畧山東督學使者例用藩臬分司歲癸未特改用詞臣始海寧顧公而武進趙公大興黃公錢唐陳公鄱陽王公繼之丙申二月王公以艱去而予官禮科給事中適承其乏則用詞臣之例又少變矣考院題名碑顧公以下皆闕丁酉季秋予任滿將去爰命工立石於舊碑之西續刻顧公以下姓名爵里而為之記曰山左為東北大都會其地

環齊魯益以曹衛之半海岱河濟皆古大國風孔子而後文學之士號稱天性漢興田氏之易伏氏歐陽氏之書淳邱氏之詩公羊氏之春秋后氏之禮並立於博士而鄭康成為六經總萃所著書百餘萬言可云極盛矣唐宋以來名儒輩出至明中葉而經術少衰說者謂皆科舉之學壞之予獨以為不然夫科舉初設經經緯史何嘗薄待天下士而使之不學無術哉自士子高閣經史但熟記八股文字互相抄撮指為捷徑遂乃靡然日下此自士子之不務實學而非立法之不善也予蒙簡拔懼無以報蒞任之初

頒布條約願與多士講求經史實學謂功令三場並重初無專重頭場之說即詩古文與時文相為表裏亦未有工於時文而置詩古文度外者顧受任日淺浹歲之中首完登萊歲試旋復奔走六郡自究而東昌而登萊而濟南以此完科試事日夜披閱苦無暇晷而錄遺之期又見迫矣自念輕才末學不能舉山左諸先正學術之源委日相淬礪姑書所志以為多士勸且深有望於後之君子焉

同上

施閏章提學道題名記山東提學道署在濟南府治之北大明湖上凡天下官署皆南面而此獨北面其始蓋至道書院也嘉靖間學臣鄒公善築以教養多士士多嚮學江陵議毀書院始改今署地與湖接水流至堦除予置石梁曰濯纓其上有高樓名之曰四照俯瞰郡城內外如指掌湖中蒲葦菱芡芙蓉之色來就几研是可樂也予視事之暇登樓縱目憑雲馭風已而引領南望其隱然若可見者為岱宗又其南則尼山鳧繹諸峯也退自念也學使者多士之師非獨校執之官也孔子布衣倡學席不暇暖教成於天下後世尚已朱子之白鹿洞陸子之鷺湖並能以官為師講道考業而胡安定教授湖州天下稱湖州先

生詔取其法著為令授國子監直講今學使者儼然為多士師操八股殿最雖有顏閔之行非文不錄而上亦以其所殿最之業定其官學使者循文法救過為幸士日以躍治風教未振夫教授之力不逮學使者而以其盛若彼以衰若此是可愧也予紹述先人理學之緒待罪齊魯之都數引諸生講業相告誡或至流涕諸生亦有感動泣下者猶懼其未能格也徬徨轉側未旦而興一日顧視廳側有題名記自薛文清以下得六十有三人而理學惟薛公為著明末至今姓氏皆闕考名次補之又得七人因為述今昔沿革

革之由湖山風物之美而重有感焉夫紹往學詔來者司教之責也其敢不惴惴以求無失墜是為記

同上

獨樹軒記學使者視事堂之西偏有軒數楹高可二尋廣半之綴以綺疏繚以素壁東坐而西向先是鍾使君所築以待賓客者也予以丙申冬十月抵歷下受事其明年當鄉試趨視學校士又奉部檄明約束不得與賓客通凡八閱月驅馳六郡不遑寧處未嘗遊息是軒也秋始休沐與二三故人宴坐四顧無所有惟古槐一樹大十圍節目磊砢攫拏蒼鬱蔽虧雲日蓋可以蔭是軒者予顏之曰獨樹屬方伯陳公朗

大書之樹側有石臺置曲檻其上舉酒觴客牆高可及肩南望千佛諸山如屏障臨几席牆外古栢數株作老人拱立狀已而明月在樹人影參差灑灑可愛軒中雙白鶴引吭長鳴如空谷風泉相響應予方一撫掌而坐客有至自江南者又將別去嗟夫子終歲驅馳與二三故人求一日晏息游眺之樂而且雜以離別之感殆婆娑意盡矣言未竟客有離席繞樹酌三爵而言曰直而不折曲而不阿樸遼而華獨立而無倚扶疎而善蔭一樹而五善備焉是不可無記予蹶起鞮然曰有是哉遂書之石

愚山集

李因培學使題名記官解有題名石刻由來舊矣非徒著明宦蹟亦使尚論者指姓名定功罪焉美與惡恒不相掩厥繫綦重哉山東學使者自吳江陳公題名後由茶陵彭先生而下十二人並僕而十三馬歷歲既久姓氏里居官秩暨受事年月幾懵然不可識任斯職者於卷牘填委篝燈校勘之餘即僕僕車轍馬跡間故常不暇為此院門外有石卧承溜下黝然若廢碑者僕常進老吏問之則礮而未鐫物也且曰院故濟南試舍曩使者數輩皆駐青州逮吳江陳公肇謀居此而故址僅至四照樓諸吏人因醵金置內

宅將刻文紀焉顧去速未暇而石特存僕既欲周知諸公姓氏政績考諸口碑以擇所師法又欲附名其末俾後來有所考鏡以定予功罪輒取其石而勒之旁搜博訪得其次第乃勒茶陵而後四人於故碑續吳江之舊自蔣懋原而後勒於新碑而多留左方以待後之君子嗟乎人之傳不傳不繫乎官闕久矣非盡無鐘鼎之鑄貞珉之刻也名故在而人莫之識則本無可稱述而已又况有穢聲遺行使人瑕疵者哉然則存其名以考實與不忘其實而因重其名乃相湏之事刻石又惡可已堂東西偏故有二碑一書官

此者自薛文清公始至徐章仲止一即吳江陳公所立並此而三云乾隆庚午歲十月

碑據

張若澐重修四照樓記樓不知經始年月考明嘉靖末副使安福鄒公繼甫始建至道書院後改今署其創於副使視學時無疑曰四照者順治中宣城施公愚山為學道時所名濟南山水擅天下會斯樓而盡於一矚誠勝境也舊時學道駐節青州康熙戊辰升道為院始移治濟南當施公揭額去嘉靖末未百年意樓尚完好又數十年為使者駐節之院今又歷七十餘年矣使院北嚮寢室直其南樓翼於寢之北於

涉足邇而游目便宜莫不攬其勝而時葺之然而自柱礎外圯壞已甚上啟下穿柱木四撐烏矢蛛網與塵填積嘗試循椳以上慄乎其將厭也乾隆丁亥夏予謀所以新之肇工於五月十七日閱四旬落成樓之上周以曲廊其下植屏疏櫺以閒之視前規有加費金以鑑計者蓋二十焉暇輒登眺於斯其南堆衆皴而沓重嶂堂者屏者脊者脇者蜀者屬者頽者蒼者蜿蜒犇蹏拱抱於橫檻之旁其左浸澄湖而倒天鏡為漪為淪為滄為泮練靜殼蹙滄膏蓄黛與夫芙蕖葭茨翹鷺游儵拚映而出沒者浮動於履舄之下

右則萬瓦鱗比薨飛欄垂而市聲人影無一接乎耳目北則雉堞參差遙天無際雜樹周連高下其林其翠發之單椒矗於東北而泰山鳧嶧隱見於迴顧之間引泉循樓除下架以石梁清能鑑而流不競濯湘皆於是乎取之至於月之午雪之霽風之爽嵐霞彩翠雨雲烟霧四時之變態雖善圖者不能殫且肖予其得而狀之耶噫樓之建迄今二百餘年矣前此繕葺與否郡縣志失載無從稽也自施公後此百餘年中前後人相望豈丹鉛甲乙外無一玩心於高明之觀者耶將職業自營之勿暇舉以傳舍視之耶抑古

人有言大官大邑身之所庇遂以此為細娛輒失諸
因仍耶夫涉足邇而游目便然且因循以至大敝况
事之隳壞於冥冥之中者耶詩曰職思其居予用謹
為之記匪獨告於後之人俾勿壞而已亦并以自警
也是役也太守徐君偕其屬歷城胡令長清李令綱
紀其事徐君名績奉天正藍旗舉人胡令名德琳廣
西臨桂進士李令名紹富湖南善化舉人時乾隆三
十二年歲次丁亥仲夏碑據
韋謙恒重修濟南考棚記畧戊子冬予奉 使視學
山左既至署見試士之所上兩旁風棟極間支以大

木墜免傾圮每一出入廩廩乎懼將厭焉按其造作
月日為康熙己酉距今已百年矣執不可以不新顧
以守令更替未遑也太守趙君由登州移濟南甫受
事蹙然曰是烏能已迺率其屬醵餘奉為鳩工庀材
貲使歷城令為之倡且董其役經始於己丑冬十月
三閱月而工訖巍然廓然視舊有增予既治具落之
并為之記夫人材之興在學校而試院則人材所由
出也况濟南為一大都會轄州一縣十有五府學兼
運學州學兼衛學為學凡十有九歲科兩試博士弟
子員至五千有奇童子則以萬計洎大比之年萃十

郡人士錄科舉於其中者又六七千夫以數萬人揮
豪吮墨含英咀華之地而令其徬徨瞻顧安乎不可
以終日誠司土者所為寢不安席也顧遲之又久及
今而始為之豈凡事之成也有時而予乃適見其煥
然於目睫之前則誠幸矣凡我多士瞻夏屋之渠渠
思締構之匪易誠枕肱經史以求所謂明體達用可
以坐而論作而行者將必有萬人之英千人之俊出
其中易曰棟隆吉其足以當之矣昔杜少陵以不得
廣廈萬間大庇寒士為歎若此者其所庇寧有既乎
趙君瓚奉天進士今遷四川驛鹽巡道歷城令萬綿

前浙江仁和貢生其捐金之牧令則德州石之珂章
邱王溥鄒平裘鵬淄川謝洙長山葉觀海新城員家
駟齊河范麗光齊東熊璋濟陽俞調元禹城胡錦臨
邑陳洛書長清高怡陵縣吳汧德平李鳴鶴平原鄧
希曾備書之所以志不忘也乾隆三十有五年歲在

庚寅上元後十日

碑據

施閏章坐獨樹軒詩客散酣歌後秋清搖落時五湖
情汗漫獨樹影枝離翦伐人難到風霜老不辭鵲巢
頭着穩莫占最高枝

愚山集

重登四照樓同諸子用樓字詩城隅一曲藕花洲官

舍重開水上樓歷下泉聲寒白日岱宗山色出高秋
獨吟散帶羣鷗靜促坐論才好客留文學性成鄒魯
在談經吾恐媿施讎同

懷二松在濟南學使署中詩手植雙松樹今年幾尺
長孤根來岱嶽寒性許風霜抱甕憑誰灌披枝著意
防關情多舊物會見爾昂藏同

巡視鹽政行署

巡鹽御史察院在清軍察院東嘉靖三年建

陸通志

高尚賢記畧嘉靖甲申歲之秋八月山東巡鹽察院
成巡按監察御史古洛景公進提學僉事高尚賢謂

之曰鹽課古今之須也禹貢青州周官鹽人吳雄煮
海齊霸鹽筴後代損益而已我朝地廣倍昔政亦善
昔其壤淮浙滄潞其產井池陂澤其務煎撈輸輓地
有攸司官有攸紀懼其無以綱之也廼監之憲臣以
登降其吏之賢否罷行其事之利病非鹽隸者亦便
宜許焉視巡按清軍均也唯是東北之路帶直隸河
南山東三境而山東且古青州之域山採海煎鹹作
惟殷醴之上矣而按無專館缺典也歲嘉靖癸未冬
藩臬長貳林公建珍潘公玉卿等度地於清軍察院
之左曰宜廼計權羨簡吏能以請於予予聽之而且

速之成夫鹽利佐國十之二三世治則流世衰則闕
是鹽之寢興天下盛衰之繫也非有重臣柄政則強
吞貪漁利不需國用不浮民自夫有監臨也商不病
租民不病味官不及侵盜不及逞是巡按之有無鹽
政通塞之繫也夫居定則志貞志貞則政豫否則席
無定暖牘無久徵而志或憧憧政由茲二察院之設
否又非巡按之所以輕重也哉而功令適成院以肅
憲憲以表藩前乎是也者志之有昭後乎是也者守
之有繼可紀也院地廣輪凡若干丈尺中後堂各五
楹重門率減堂制之二而穿堂後廳書房如之旁之

廂房又概諸此而加一焉言言翼翼細大成飭厥度
視巡按清軍察院而高廣之其謀之也巡鹽桂陽范
公古閩鄭公浮梁盧公潛江初公盧江黃公實首之
其贊之也巡撫靜齋陳公南臯王公巡按四明孫公
清軍平崖林公實協之畢務則軍使歐陽君誥知府
鍾君梁者屬焉厥惟大較也子盍為我記之賢拜曰
遠哉先生所謂計國之說也賢何加焉因推而記之

陸通志

貢院

貢院在布政司東洪武初建成化十九年重修嘉靖

元年重建至公堂陸通志

貢院號舍初建止六千間雍正十年增建至一萬岳通志

按乾隆二年巡撫岳濬重建至公堂二十一年巡撫愛必達重修三十二年知縣胡德琳修

劉珮記山東重修貢士院經始於成化癸卯春正月十九日以是歲夏五月十八日畢工其為日凡百有二十至公堂明遠樓則因其舊而稍新之受卷彌封謄錄對讀四所分別堂之左右其視舊廣三之一監臨提調監試凡三所咸有序次而供給所則置於堂

之東南隅此簾外也簾內考試官較藝有房而增置者又六間東厨五間至於舉子場屋舊嘗以席舍為之乃易以板凡千二百有餘間嗚呼至矣先是巡按監察御史古蔚宋公經以歲將大比詣院視之顧其地隘不易於容眾即更欲開廣以事弗獲既而左方伯得澠池戴君珙到不旬日即與謀之戴嘗以老成練事有聲稱聞甚喜焉而按察使當塗端君宏輩又和之乃召其居隣者平其地值價予再倍得民人馬良等十四家廣八丈五尺長四十餘丈遂成茲舉闢隘而廣易舊而新煥然為一方之壯觀作人之功不

亦偉哉督其事者濟南同知徐君宣而工匠力役之衆不書既閱月經乃走書京師乞東齊壽光劉珣為之記嘗聞人才之產蓋鍾山川之秀而其成也則又恒繇於君子風聲氣習之所養通天下古今而言也竊以山東為古齊魯地山則泰嶽川則東海而孔曾思孟之遺風餘習千萬載為不泯是以才士產於其間則夫善觀人才者宜以山東為何如燕之角荆之幹妣胡之筈吳越之金錫惟產得其地而為木之美人何為獨不然今朝廷設科目以網天下士而士之抱竒負異以人才自命者罔不繇科目進矣况山東

雄藩密邇京畿非他方比者乎予以重修貢士院為諸君作人之盛事既記其實而因以及齊魯人才之所以盛蓋不為無本非誇也

陸通志

王廷相記嘉靖元年正月巡按山東監察御史李公獻以歲當鄉舉乃咨於藩臬諸君曰吾聞之祇事者厥備預濟務者厥慮周故行無疎沮而悔吝亡茲將大比庶士於省諸君盍慎圖之因行視貢院以至公堂卑隘弗稱弗資於高明公曰此非所以壯觀斯文之園也可撤舊貫更制之於時右布政使陳君奎按察使江君潮皆唯唯遂相度為廣拓之宜復請於巡

撫都御史陳公鳳梧公曰興賢於鄉朝廷大典御史君綜理周詳實惟嘉政諸司其翼厥成事可於是司計費市材課工戒徒六越月堂成巍如煥如屹屹湖山之間可觀矣其廬舍門屏几榻之具罔不繕麗公曰此居處之美爾人事弗稱猶之務飾也乃復咨於諸君曰聞之往事舉子激勸之需百度供應之費乃不下萬計皆檄諸屬辦之及期民恒以病告此不可循者也均一用財也與其徵於民之難孰與出於官之為便乃盡以嶽廟香錢充之故事集而民不困雖然舉不得賢猶之務末矣而無益也公之既鎖院

也極防範之周覈校閱之實諸職事雖與聞乎三試之卷終莫以察士子之為何諸典文者雖無以撓於外終不得以險僻蕪陋之詞以奪乎才士嗟乎此非得賢之實乎非天下之至公其何能與於此堂之名實不其相符乎哉夫顯於經理之謂事由於倫義之謂道道者事之質也是故泥乎經者蔽於權任乎己者蔽於人飾於末者蔽於本斯皆一隅一曲非腐朽則閹塞不足以語於道者由公之事觀之始而公所之修繼而民事之恤終而要諸得賢之實是經權人已本末之際兼舉而無遺矣非會於道者能之哉是

故或謂之疏通或謂之精實或謂之懸衡或謂之旁
 燭君子曰是道也在制事則為率智在修職則為秉
 誠在事君則為竭忠可以式來哲矣歌鹿鳴之餘右
 布政使王君軌按察使林君琦請勒堅珉以揚休政
 僉曰廷相宜述其事因繫之辭帝咨丞弼宏化亮工
 選材登良下國是同穆穆文學齊魯趨風彼賢之獲
 監臨之功公來監茲式周綜紀積弊之剔百廢之起
 高明洞豁顯允君子建斯偉猷視此堂只維堂峩峩
 在湖之旁靈氣鬱勃斯文之昌瞻彼東方聖賢是常
 乘運翊化俾也無疆維堂奕奕在湖之會曰賢之興

實道之泰曾是風化曾是德藝為世之防於焉有賴
 公也掄士朗鑒邁古事君以人上臣所取麟角鳳苞
 譽髦楚楚亦附宗周黨里之舉爾車良矣可以從禽
 爾綆修矣可以汲深君子有道制事制心千祀其衍

懷我徽音

同上

巡撫故署

以下俱故署

巡撫都察院在濟南府治之西南隅成化元年建正
 德二年燬於火八年巡撫副都御史安成趙璜重建

陸通志

巡撫都察院萬歷間改督撫軍門崇正戊寅又燬於

火顏中丞繼祖市民居而益廓之吏解皆易以樓未
及落輒經兵火庚辰巡撫王公國賓重修舊志

都指揮司署

山東都指揮使司在府治西成化二年建陸通志 崇正

己卯燬都閩季公國祚重建舊志

經歷司斷事司在司內舊志載有司獄司久裁斷事

司康熙年裁趙通志

按都司雍正三年裁故署改為灤源書院

陳鎬記我太祖高皇帝天錫神武戡定海宇酌古兵
制內建五府以總戎政而都司衛所自京畿以至四

方分轄控馭綱維井井誠有前代所不及者山東都

司初在青州移建濟南面山帶泉頗據形勢成化初

創造德藩府第徙西巷址湫隘前政若都指揮同知

朱昇及丁全皆嘗請於撫按開拓修飾有加於舊歲

久已敝而大門尤極庳淺觀視弗稱都指揮僉事滕

陽申邦靖來掌司事既三年為宏治乙丑二月請於

巡撫都憲徐公巡按陸君支藩司公帑錢若干緡鳩

工市材增高舊門三間少進而北墜綽楔三架以臨

通衢規制宏碩丹碧輝映題其榜曰宣威用是都垣

氣象煥然一新覩者快焉是年五月畢工請予文為

記夫都司內承督府外統山東諸衛所實與藩臬二司文武並建蓋所以為保障地方隄備姦宄計且在郊畿千里之內密邇天京非他藩比而門廡出入之地僅同下署殆不可謂之非戎務所急也易曰重門擊柝以待暴客蓋取諸豫夫思患豫防之道無微可忽而莫嚴於門申君思壯國威而勤心於是其知易者與是役也三司若大方伯曹公以貞憲長賈公良金輩暨都指揮僉事尹君升之王君良璧楊君景高揚君志剛咸贊相之又因司之東北西南兩隅解舍與居民相湊偏穿喧雜乃請於巡撫御史金君得贓

罰楮價錢若干緡售而廣之又以餘貲增建後堂之前楹與司獄之所繫囚之室為屋若干楹規畫經理皆出錢君蓋君之才畧於是亦可驗云

據碑

濟南衛署在舜廟西洪武十九年建

舊志

五千戶所鎮撫司經歷司俱在衛署內

同上

張爾岐濟南衛署圖詩序畧達菴劉將軍之蒞濟南衛也政理多暇風雅自怡一時勝士之來游濟南者無不過其署相與稱詩而襄城黃生繪其署以為圖既乃哀諸唱和酬贈之作附其後合為一巨冊時達菴方將改蒞江西予門人曾生往與之別達菴出圖

相示且令索序於予自六七年前即聞濟南衛劉將軍能詩諸號為能詩者多從之游心切向慕之繼而讀其詩乃大嘆異私自詫於所識謂其風骨神味在輞川襄陽之間又謂其靈快似其家希夷而渾妙則似春虛人多以為然因時時思造其廬今南行有日度終不可一見而此六七年時相遇於恍惚愴怛之中者何以自慰也於是不辭讓而為之序

萬菴集

清軍御史署在濟南府治北成化十二年建

陸通志

提督署

提督軍門在濟南府城內府治東舊係巡按御史察

院順治十七年裁巡按御史十八年增設總督改為總督察院并規鹽政衙門於內康熙三年裁總督五年提督自青州府移鎮於此

趙通志

太僕館

濟南兗州東昌三府屬皆設

陸通志

巡按御史署濟南府治東

同上

巡按署洪武三十年建

舊志

王應鵬記察院風紀之所由出弗嚴則弗慎前巡按山東監察御史熊君尚弼以舊院弗式房廊館庫亦有不便於閑者圖新之君至自己卯之秋七日即有

事於賓興既而又有事於軍旅以軍旅而張皇者無
虛日然其他政益舉弊益釐風清於海隅絕島呻者
謠慝者良非才且力其孰能之於是院未及新而表
其兩坊所謂肅僚貞度者是已庚辰秋予以代至君
曰某事吾為子劄之曷稽之某事吾為子啟之曷終
之又曰舊院敝吾欲為子新之吾經營子曷成之予
應之曰諾退而思焉君其與人為善者乎其不以去
住為心而止作之者乎何其公而能施也予嘗怪夫
今之仕者於交承之分或鮮忠告多容心焉容心者
私心也又怪夫今之仕者視公居如傳舍棟橈垣圯

而不恤若曰人將訾我則亦安能悝悞大厦而庇我
元元乎此君之志所以為廣而其賢為不可及也故
吾於君多述焉吾不甚勤而君之志益以彰焉豈特
茲院之修而已耶院之修仍其故而修之者曰儀門
曰東西廂曰隸所曰冊庫各若干楹無所於故而新
之者曰卷閣凡若干楹去其故而新之者曰尚賓館
凡若干楹為諸司文衡者而設故堂必闢之門必重
之垣繚必崇居處必析然而視諸制亦以華焉華之
者所以尚之也故曰尚者上也加也是役也始於辛
巳之春而成於其夏未嘗病一夫也庶幾其嚴乎

陸通

